

DOMENIE I DI CUARESIME

Jutoris pe Liturgjie

Domenie, ai 18 di Fevrâr

Cul Miercus de cinise e je començade Cuaresime. O podaressin dî che a esistin dôs coresimis: chê de glesie e chê de vite. Chê de glesie e dipent de date di Pasche e e à un significât ben precîs: preparâmus al sacri Tridui pascâl, a rinova il Batisim midiant de nestre conversion e a viodi il mont cui voi passionâts e risussitâts dal Signôr. Timp di riflession, duncje, parcè che l'om nol vivarà dome di pan, ma di ogni peraule ch'è ven fûr de bocje di Diu (Mt 4, 4); timp di silenzi, di fâ alc di desert dulintor di nô.

Ma e je ancje la Cuaresime de vite li che une tiere cence amîs, un silenzi cence rispuestis, une riflession tormentade ti travanin anime e cuarp e a puedin butâti fin te disperazion. Al è rivât il timp de prove, la Cuaresime di Gjesù cuant che ancje lui tal desert al jere cu lis bestiis salvadiis e si domandave se al veve di dâ un significât gnûf a lis sôs zornadis in chest mont.

Rivade la Cuaresime de vite, al è rivât il moment di ricuardâ che il Spirit, il Spirtu Sant, al sburtà Gjesù tal desert. E lui al restà intal desert.

Che o sedin te Cuaresime liturgjiche o in chê de vite, la glesie te sô sapience nus invade a a no butâ vie il nestri timp, ma a ricjatâ un cjanton e un moment par riviodi la nestre situazion cul Signôr. Dome cussì o podarìn in maniere mistereose partecipâ a la Pasche dal an liturgjic e soledut vivi la Pasche de liberazion e de resurezion de nestre vite.

Antifone di jentrade

cf. Sal 90,15-16

Cuant che mi clamarà, i rispuindarai;
lu salvarai e i darai une grande innomine,
lu saciarai cuntune vite lungje.

No si dîs Glorie a Diu.

Colete

Diu onipotent, pal sacrament de Cuaresime ch'ò celebrin ogni an,
danus di rivâ a cognossi simpri plui a font il misteri di Crist
e di compagnâlu cuntune vite degne di lui.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par duçj i secui dai secui.

PRIME LETURE

Gjen 9,8-15

Il pat jenfri Diu e Noè liberât des aghis dal diluvi.

Cetant consolante che e devente cheste leture; jê nus presente un Diu che nol à in man, come lis antighis divinitâts, arc, freccis e fulmins. Culî, no un arc di vuere, ma un arc di aleance e di pâs si slargjie par unî cîl e tiere.

Taramots, diluvis, disastros a son simpri stâts e milions e milions di vitis si cjatin tun diluvi concret ancje vuê! Al è di zontâ a dut chest il diluvi dal pecjât che nus rint disumans, sotuman, piês des bestiis. Di fat di dentri vie, ven a stâi dal cûr dai oms, a vegnin fûr i triscj pinsîrs, lis fornicacions, lis robariis, i sassinaments, i adulteris, lis bramis, lis tristeriis, l'imbroi, lis porcariis, l'invidie, la blesteme, la supierbie e la stupiditât. Dutis chestis brutis robis a saltin fûr di dentri vie e a sporcjin l'om (Mc 7, 21-22) e a gjenerin diluvis di tribulacions e di muart tal piçul e tal grant e a no finî.

Ma al dîs sore di nô e sore di chest mont, sore i nestris faliments e pecjâts, il Diu de misericordie nus continue a dî: cuant che si viodarà l'arc framieç dai nûi, jo m'impensarai dal pat ch'ò vin fra me e

vualtris e cun ducj i vivents. *Nus racomande il profete: Sbregait il vuestri cûr, e tornait dal Signôr, vuestri Diu! (Gl 2, 13). Sêstu benedet Signôr pe tô misericordie. Amen.*

Dal libri de Gjenesi

Diu i fevelà a Noè e ai siei fis: «Ve ch'o fâs un pat cun vualtris, e cun chei ch'a vignaran daûr di vualtris e cun ogni vivent ch'al è cun vualtris: ucei, nemâi, dutis lis bestiis salvadiis ch'a son cun vualtris, cun ducj chei ch'a son saltâts fûr da l'arcje, ven a stâi cun ducj i nemâi de tiere. O fâs un pat cun vualtris: dut ce ch'al è, nol sarà plui menât vie des aghis dal diluvi; no 'nt sarà plui diluvis par disfâ la tiere».

E Diu al disè:

«Ve chi il segnâl dal pat

ch'o fasarai

fra me e vualtris

e cun ducj i vivents

ch'a son cun vualtris

par dutis lis gjenerazions a vignî:

o met il gno arc intai nûi

e al deventarà un segnâl di aleance

fra me e la tiere.

Cuant che o pararai dongje

i nûi sore la tiere

e che si viodarà l'arc framieç dai nûi,

jo m'impensarai dal pat

ch'o vin fra me e vualtris

e cun ducj i vivents, ven a stâi cun ogni cjar;

e lis aghis no deventaran mai altri

un diluvi par disfâ ogni cjar».

Peraule di Diu.

SALM RESPONSORIÂL

dal Salm 24

Ogni invocazion di chest salm e pues sedi une nestre invocazion, ogni domande di misericordie o podìn fâle nestre, se o sintìn di jessi puars devant di Diu e o cirìn la sô gracie che e perdone e e salve. Parcè che Lui, ai puars, ur insegnarà la sô strade.

R. Lis stradis dal Signôr a son veretât e justizie.

Se cjantât, Il cjant dai salms responsoriâi, p. 107.

Mostrimi, Signôr, lis tôs stradis,

insegnimi i tiei trois.

Fasimi lâ indenant te tô fedeltât,

parcè che tu tu sês il Diu che mi salve. **R.**

Visiti, Signôr, dal to boncûr

de tô misericordie che di simpri e dure.

Visiti di me seont il to boncûr,

Signôr, te tô misericordie. **R.**

Bon e just al è il Signôr;

par chel al indreçarà i pecjadôrs pe sô strade.

Al fasarà cjaminâ i puars te sô justizie

e ur insegnarà la sô strade. **R.**

SECONDE LETURE

1 P 3,18-22

L'arcje e je spieli dal batisim, ch'al salve.

O podìn ritignî cheste lezion une ri-visitazion de leture dal diluvi che o vin a pene scoltade. Seont i studiâts al è un toc difìcil di capî, ma a nô nus baste savê che l'arcje di Noè e rapresente il nestri batisim, che Crist al è lâf a predicjâ la salvece ancje in chel altri mont; che o podìn domandâi a Diu la salvece...in virtût de resurezion di Gjesù Crist. E dut al è incurisât in chês peralis: Crist al è muart une volte par simpri pai vuestris - nestris - pecjâts, lui just pai no juscj, par tornâus a menâ a Diu.

Di plui di cussì, par nô, ce podevial fâ!

De prime letare di san Pieri apuestul

Benedets, ancje Crist al è muart une volte par simpri pai vuestris pecjâts, lui just pai no juscj, par tornâus a menâ a Diu; fat murî seont la cjar ma tornât vîf seont il spirt.

E in spirt al è lâf a predicjâ la salvece ancje ai spirits ch'a spietavin in preson; lôr par vieri a vevin refudât di crodi cuant che la pazienze di Diu e spietave tai dîs di Noè, biel ch'al faseve l'arcje, dulà che dome pocj personis, vot in dut, a forin salvadis midiant da l'aghe. Spieli cheste dal batisim, che cumò us salve vualtris; che nol è il parâ jù la sporcjetât dal cuarp ma il domandâi a Diu la salvece cuntune buine condote, in virtût de resurezion di Gjesù Crist ch'al è a la gjestre di Diu, dopo di jessi lâf sù in cîl e di vê vude la paronance sui agnui, sui principâts e su lis autoritâts.

Peraule di Diu.

CJANT AL VANZELI

Mt 4,4

R. Laut a ti, o Crist, re di eterne glorie!

L'om nol vivarà dome di pan,
ma di ogni perauale ch'e ven fûr de bocje di Diu.

R. Laut a ti, o Crist, re di eterne glorie!

VANZELI

Mc 1,12-15

Gjesù, tentât di satane, al è servît dai agnui.

Marc nus presente la Cuaresime di Crist in dôs riis. Pai teolics al è masse pôc, e duncje lôr a àn cirût di insiorâ dut chest midiant di tancj paragons. Tignìn presint che il Spirit al sburtà Gjesù tal desert e chest al pues sucedi ancje par nô. Lis bestiis salvadiis lu tormentavin e i agnui lu servivin. Dongje dal Signôr, fra tribulazions e consolazions, fra puaretât e providence, o podìn fâ esperience di chest ancje nô.

Gjesù al è jentrât tal desert rivant di Nazaret e al jessì cambiât; di fat al vignì in Galilee, predicjant il vanzeli di Diu. La sô Cuaresime i veve segnade la gnove strade di fâ. Che ancje la nestre Cuaresime, vivude dongje di lui, nus judi in chest.

Dal vanzeli seont Marc

In chê volte, il Spirit al sburtà Gjesù tal desert. E lui al restà intal desert par corante dîs, tentât di satane. Al jere cu lis bestiis salvadiis e i agnui lu servivin.

Dopo che Zuan al fo metût in preson, Gjesù al vignì in Galilee, predicjant il vanzeli di Diu.

Al diseve: «Il timp si è colmât e il ream di Diu al è rivât. Poben, convertîtsi e crodêt tal vanzeli».

Peraule dal Signôr.

Si dîs O crôt.

Su lis ufiertis

Danus la gracie, Signôr,

che la nestre vite e sedi ben intonade ai regâi che ti ufrîn
tal celebrâ l'inizi di chest sacrament cussì venerabil.
Par Crist nestri Signôr.

Antifone a la comunion

Mt 4,4

L'om nol vivarà dome di pan,
ma di ogni peraule ch'e ven fûr de bocje di Diu.

O ben: cf. Sal 90,4

Il Signôr ti taponarà cu lis sôs plumis,
tu cjatarâs ripâr sot des sôs alis.

Daspò de comunion

Daspò di vênus sostentâts cul pan dal cîl,
ch'al nudris la fede, al fâs cressi la sperance e al rinfuartis la caritàt,
insegninus, Signôr, a vê fan di chel ch'al è l'unic pan vîf e vêr
e a vivi di ogni peraule ch'e salte fûr de tô bocje.
Par Crist nestri Signôr.

Preiere sul popul

La tô benedizion ch'e dismonti bondante
sul to popul, Signôr,
par che inte tribulazion e cressi la sperance,
inte tentazion si rinfuarci la virtût,
e al puedi rivâ a la redenzion eterne.
Par Crist nestri Signôr

* * *

Riflession di pre Antoni Beline: **La tentazion**

Ducj i dîs dal an e de vite a son compagns denant di Diu, ma la glesie i à simpri dade grande impuartance a di chest timp sant de Cuaresime, cuant che i gnûfs cristians si preparavin al batisim e ae vite gnove in Crist midiant de preiere, dal dizun, de riflession e de pinitince. Ma une pinitince interiôr...

Vanseli par un popul, an B, p. 44.

* * *

Cjants dal timp di Cuaresime

- Parce Domine, *n. 125*;
- Signore guardaci nel tuo amore, *n. 126*;
- O muse insanganade, *n. 128*;
- O capo insanguinato, *n. 129*;
- O Signôr a schene plete, *n. 130*;
- Viers la cjase amade, o Pari, *n. 131*;
- Crist, Fi di Diu, ve dûl di nô, *n. 132*;
- Gno Diu, mê ruvîs là che mi pari, *n. 133*;
- Se il timp che Diu ti preste, *n. 134*;
- Come a l'aghe de fontane, *n. 135*;
- Quanta sete nel mio cuore, *n. 136*;
- Alla tua mensa, amato Salvatore, *n. 137*.

Salm dal Miserere, n. 50.

- Misere mei Deus, *n. 231*;
- Ve dûl di me, *n. 252*; *n. 253*.

Strade de crôs, n. 138;

Via crucis, *p. 285*.

Tal libri Hosanna, si puedin cjatâ ancjemò altris cjants e salms adats al timp di Cuaresime.

* * *

*Nol è motif di pratindi la libertât
se cheste libertât no compuarte il permes di sbalgjâ e ancje di pecjâ.
Se Diu che dut al pò, i à dade la libertât di sbalgjâ ancje a la plui umile des sôs creaturis,
no rivi a capî cemût che determinadis personis, validis e di esperience,
a improibissin a altris un dirit tant preziôs.*

M. Gandhi

* * *

- * *I cjants, salms e cjantadis a vegin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La nuova base.*
- * *Par domandâ chescj libris scrivêt a info@glesiefurlane.org*